



# ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ք. Երևան

13.08.2019թ.

## Ո Ր Ո Շ ՈՒ Մ

### ՀՀ գնումների հետ կապված բողոքներ քննող անձի թիվ ԱՑ-ՆԳ-2019/124

Հայաստանի Հանրապետության գնումների հետ կապված բողոքներ քննող անձը՝ ի դեմս Գրիգոր Ներսիսյանի, ուսումնասիրելով Հայաստանի Հանրապետության ֆինանսների նախարարության 19.07.2019թ. թիվ 26/26-1/12057-2019 գրությամբ «Ռեսալ Սոֆտ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգով ներկայացված հիմքերը՝ պարզեցի հետևյալը.

#### **1. ՀՀ ֆինանսների նախարարության ներկայացրած փաստերը և պահանջը.**

ՀՀ ֆինանսների նախարարությունը, Երևանի Մ. Հերացու անվան պետական բժշկական համալսարանի հիմնադրամի (հետայսու նաև՝ Պատվիրատու) 12.07.2019թ. թիվ v02.4/[14563]-19 գրության պատճենի հիման վրա, 19.07.2019թ. թիվ 26/26-1/12057-2019 գրությամբ դիմել է ՀՀ գնումների հետ կապված բողոքներ քննող անձին՝ խնդրելով նախաձեռնել «Ռեսալ Սոֆտ» ՍՊԸ-ին (հետայսու նաև՝ Ընկերություն) գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

## **2. «Ռեսալ Սոֆտ» ՍՊԸ-ի ներկայացրած փաստարկները և դիրքորոշումը.**

«Ռեսալ Սոֆտ» ՍՊԸ-ն 30.07.2019թ. Գնումների հետ կապված բողոքներ քննող անձին ուղղված գրությամբ հայտնել է հետևյալը.

«Երևանի Մխիթար Հերացու անվան պետական բժշկական համալսարան» հիմնադրամի կարիքների համար կազմակերպվել է «ԳՀԾՁԲ-2019/10-ԵՊԲՀ» ծածկագրով գնանշման հարցման ընթացակարգ (հետայսու նաև՝ Ընթացակարգ), որին 16.05.2019թ. մասնակցության հայտ է ներկայացրել նաև «Ռեսալ Սոֆտ» ՍՊԸ-ն և 2-րդ չափաբաժնի մասով ճանաչվել է առաջին տեղ զբաղեցնող մասնակից:

Այնուհետև, Ընթացակարգի գնահատող հանձնաժողովը հարցում է կատարել ՀՀ ՊԵԿ՝ առաջին տեղ զբաղեցրած մասնակցի ՀՀ պետական բյուջեի նկատմամբ ժամկետանց հարկային պարտավորությունների վերաբերյալ:

Ի պատասխան վերոնշյալ հարցման՝ ՀՀ ՊԵԿ-ի կողմից տրվել է եզրակացություն, համաձայն որի «Ռեսալ Սոֆտ» ՍՊԸ-ն հայտը ներկայացնելու օրվա դրությամբ /16.05.2019թ./ ՀՀ պետական բյուջեի նկատմամբ ունի հարկային մարմնի կողմից վերահսկվող եկամուտների գծով օրենքով նախատեսված շեմը գերազանցող ժամկետանց պարտավորություն 55 000 ՀՀ դրամ:

Իսկ արդեն Ընթացակարգի գնահատող հանձնաժողովի 08.07.2019թ. տեղի ունեցած նիստի թիվ 6 արձանագրության 1.3 կետի համաձայն՝ գնահատող հանձնաժողովը որոշեց մերժել «Ռեսալ Սոֆտ» ՍՊԸ-ի կողմից ներկայացված հայտը:

Ընկերությունը վկայակոչել է հետևյալ իրավական հիմքերը և հիմնավորումները.

«Գնումների մասին» ՀՀ օրենքի (հետայսու նաև՝ Օրենք) 6-րդ հոդվածի 1-ին մասի 2-րդ կետի համաձայն՝ բացառությամբ սույն օրենքի 23-րդ հոդվածի 1-ին մասի 1-ին, 3-րդ, 4-րդ և 5-րդ կետերով նախատեսված ընթացակարգով գնում կատարելու դեպքերի, գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունեն իրենց ներկայացրած գնային առաջարկի մինչև մեկ տոկոսը, բայց ոչ ավելի, քան հիսուն հազար Հայաստանի Հանրապետության դրամը գերազանցող ժամկետանց պարտավորություններ.

ՀՀ պետական եկամուտների կոմիտեի կողմից ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 43-րդ կետի 3-րդ ենթակետով և 44-րդ կետով սահմանված կարգով տրամադրված եզրակացության համաձայն՝ «Ռեսալ Սոֆտ» ՍՊԸ-ն հայտը ներկայացնելու օրվա դրությամբ ՀՀ պետական բյուջեի նկատմամբ ունի 55,000 ՀՀ դրամի ժամկետանց հարկային պարտավորություններ:

Ընկերությունը հայտնել է, որ «Ռեսալ Սոֆտ» ՍՊԸ-ի մոտ հայտը ներկայացնելու օրվա դրությամբ առկա ժամկետանց հարկային պարտավորությունը առաջացել է «ՀՀ պաշտպանության ժամանակ զինծառայողների կյանքին կամ առողջությանը պատճառված վնասների հատուցման մասին» ՀՀ օրենքի համաձայն՝ վճարման ենթակա դրոշմանիշների վճարման գծով:

Ընկերությունը նշել է, որ ՀՀ ԿԱ ՊԵԿ նախագահի 2017թ. հուլիսի 19-ի թիվ 228-Ն հրամանի (հրապարակված է [www.arlis.am](http://www.arlis.am) համակարգում) համաձայն՝ սահմանվել է վերահսկվող եկամուտների գծով պարտավորությունների վերաբերյալ տրվող տեղեկանքը ձև, որտեղ որպես հարկային մարմնի կողմից վերահսկվող եկամուտների գծով պարտավորություն «ՀՀ պաշտպանության ժամանակ զինծառայողների կյանքին կամ առողջությանը պատճառված վնասների հատուցման մասին» ՀՀ օրենքի համաձայն՝ վճարման ենթակա դրոշմանիշների վճարը ընդհանրապես նախատեսված չէ:

ՀՀ ԿԱ ՊԵԿ նախագահի արդեն 2018թ. ապրիլի 11-ի թիվ 245-Ն հրամանի (հրապարակված է [www.arlis.am](http://www.arlis.am) համակարգում) համաձայն՝ սահմանվել է վերահսկվող եկամուտների գծով պարտավորությունների վերաբերյալ տրվող տեղեկանքի նոր ձև, որտեղ որպես հարկային մարմնի կողմից վերահսկվող եկամուտների գծով պարտավորություն «ՀՀ պաշտպանության ժամանակ զինծառայողների կյանքին կամ առողջությանը պատճառված վնասների հատուցման մասին» ՀՀ օրենքի համաձայն՝ վճարման ենթակա դրոշմանիշների վճարը նույնպես նախատեսված չէ:

Սակայն «Երևանի Մխիթար Հերացու անվան պետական բժշկական համալսարան» հիմնադրամի կարիքների համար կազմակերպվել է «ՀԾԶԲ-2019/10-ԵՊԲՀ» ծածկագրով գնանշման հարցման ընթացակարգի շրջանակներում բացահայտվել է, որ Ընկերությունն ունի հարկային մարմինների կողմից վերահսկվող եկամուտների գծով պարտավորություն՝

«ՀՀ պաշտպանության ժամանակ զինծառայողների կյանքին կամ առողջությանը պատճառված վնասների հատուցման մասին» ՀՀ օրենքի համաձայն՝ վճարման ենթակա դրոշմանիշների վճարի գծով (նման պարտավորության առկայության փաստը մինչ այդ երբևիցե չի ներկայացվել ՊԵԿ-ի կողմից):

Միևնույն ժամանակ «Հարկ վճարողի անձնական հաշվի քարտի» քաղվածքի համաձայն՝ «Ռեսալ Սոֆտ» ՍՊԸ-ն հայտը ներկայացնելու օրվա դրությամբ հարկային մարմինների կողմից վերահսկվող եկամուտների գծով ժամկետանց պարտավորություններ չունի: Եվ պետք է նշել, որ Ընկերության միասնական հաշվի պատկերում արտացոլված չէ դրոշմանիշների վճարի վերաբերյալ որևէ տեղեկատվություն, և «Ռեսալ Սոֆտ» ՍՊԸ-ի հայտը ներկայացրել է՝ հիմք ընդունելով «Հարկ վճարողի անձնական հաշվի քարտի» տվյալները, ըստ որի՝ Ընկերությունը հայտը ներկայացնելու օրվա դրությամբ ՀՀ պետական բյուջեի նկատմամբ հարկային մարմնի կողմից վերահսկվող եկամուտների գծով պարտավորություններ չունի: Միևնույն ժամանակ, «Հարկ վճարողի անձնական հաշվի քարտի» քաղվածքում վկայակոչված է ՀՀ ԿԱ ՊԵԿ նախագահի դեռևս 2018թ. ապրիլի 11-ի թիվ 245-Ն հրամանը:

Փաստացիորեն առկա է եղել արձանագրված պարտավորության մասով «Ռեսալ Սոֆտ» ՍՊԸ-ի իրազեկված չլինելու հանգամանքը, քանզի Ընկերությունը հայտը ներկայացնելու օրվա դրությամբ հարկային մարմինների կողմից վերահսկվող եկամուտների գծով ժամկետանց պարտավորությունների վերաբերյալ տեղեկություններ կարող էր ստանալ միայն «Հարկ վճարողի անձնական հաշվի քարտի»-ից, իսկ ինչպես արդեն նշվել է, նշված քարտի տվյալների համաձայն՝ Ընկերության հայտը ներկայացնելու օրը չունի հարկային մարմինների կողմից վերահսկվող եկամուտների գծով որևէ պարտավորություն:

Ընկերությունը գտնում է, որ նման դեպքում արձանագրված պարտավորությունը չի կարող դիտարկվել «Ռեսալ Սոֆտ» ՍՊԸ-ի հայտը ներկայացնելու օրվա դրությամբ մարմինների կողմից վերահսկվող եկամուտների գծով պարտավորություն:

Միևնույն ժամանակ հայտնել է, որ «Ռեսալ Սոֆտ» ՍՊԸ-ի կողմից 18.07.2019թ. հարցում է ներկայացվել ՀՀ ՊԵԿ, որով խնդրել է հայտնել՝ 16.05.2019թ. առկա 55.000 ՀՀ դրամ պարտքը՝ դրոշմանիշների վճարման գծով, երբ է առաջացել և որ ժամանակահատվածի համար:

Ի պատասխան վերը նշված հարցման ՀՀ ՊԵԿ-ը 18.07.2019թ. տրամադրած թիվ 1379 գրությամբ պատասխանել է /կցվում է/, որ 16.05.2019թ. դրությամբ ընկերության դրոշմանիշային վճարի գծով ժամկետանց պարտքը կազմել է 55.000 ՀՀ դրամ, որը վերաբերում է 2018թ. օգոստոսից-դեկտեմբեր և 2019թ. հունվարից-մարտ ամիսների հաշվարկներին, իսկ դրոշմանիշային վճարի հաշվարկման համար հիմք է հանդիսացել կազմակերպության կողմից հարկային մարմին ներկայացված եկամտային հարկի և սոցիալական վճարի ամսական հաշվարկները:

Այն ժամանակ, երբ «Ռեսալ Սոֆտ» ՍՊԸ-ն տեղեկացել է ԳՀԾՁԲ-2019/10-ԵՊԲՀ ծածկագրով գնանշման հարցման ընթացակարգի գնահատող հանձնաժողովի կողմից հայտը մերժելու մասին և այն թե ինչ հիմքով է մերժվել հայտը՝ Ընկերության հաշիվները սպասարկող «Ինեկոբանկ» ՓԲԸ-ի «Գյումրի» մասնաճյուղի աշխատակցին խնդրել է ներկայացնել «Ռեսալ Սոֆտ» ՍՊԸ-ի կողմից բանկի մասնաճյուղի կողմից կատարված փոխանցումների համապատասխան վճարային հանձնարարականները /դրոշմանիշային վճարի գծով/:

Հանձնարարականների ուսումնասիրության արդյունքում պարզ է դարձել, որ «Ռեսալ Սոֆտ» ՍՊԸ-ի կողմից 2018թ. օգոստոսի 17-ին, սեպտեմբերի 8-ին, հոկտեմբերի 9-ին, նոյեմբերի 14-ին, դեկտեմբերի 12-ին, 2019թ. հունվարի 14-ին, 2019թ. հուլիսի 2-ին կատարվել են դրոշմանիշային վճարների գծով վճարումները, որը հավաստվում է նաև սույն դիրքորոշմանը կցվող վճարային հանձնարարականներով, որտեղ որպես գործարքի նպատակ նշվել է դրոշմանիշային վճար, սակայն կամ «Ինեկոբանկ» ՓԲԸ-ի կամ Կենտրոնական գանձապետարանի անփույթ և անհետևողական աշխատանքի արդյունքում դրոշմանիշային վճարի գծով կատարված վճարումները չեն փոխանցվել համապատասխան հաշվեհամարին:

Այս պարագայում Ընկերությունը գտնում է, որ արձանագրված պարտավորությունը չի կարող դիտարկվել «Ռեսալ Սոֆտ» ՍՊԸ-ի հայտը ներկայացնելու օրվա դրությամբ մարմինների կողմից վերահսկվող եկամուտների գծով պարտավորություն, քանի որ «Ռեսալ Սոֆտ» ՍՊԸ-ն սահմանված ժամկետներում կատարել է դրոշմանիշային վճարների գծով վճարումները, սակայն փաստացիորեն առկա է եղել արձանագրված «Ինեկոբանկ» ՓԲԸ-ի կամ Կենտրոնական գանձապետարանի անփույթ աշխատանքի հետևանք, որի

արդյունքում կատարված վճարումները չեն փոխանցվել համապատասխան հաշվեհամարին:

Հիմք ընդունելով վերը նշված փաստերը, փաստական հանգամանքները և «Ինեկորբանկ» ՓԲԸ-ի «Գյումրի» մասնաճյուղի կողմից տրամադրած վճարային հանձնարարականները՝ Ընկերությունը խնդրել է «Ռեսալ Սոֆտ» ՍՊԸ-ին չվերագրել «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետով նախատեսված գնման գործընթացի շրջանակում ստանձնած որևէ պարտավորության խախտում, և վերջինիսի չներառել «Գնումների գործընթացին մասնակցելու իրավունք չունեցող մասնակիցների ցուցակում»:

Ընկերությունը, պատշաճ ծանուցված լինելով ՍՑ-ՆԳ-2019/124 ընթացակարգի շրջանակներում 25.07.2019թ. ժամը 10:15-ին հրավիրված նիստի վերաբերյալ, չի ապահովել իր ներկայացուցչի մասնակցությունը:

### **3. «Երևանի Մխիթար Հերացու անվան պետական բժշկական համալսարան» հիմնադրամի կողմից ներկայացված փաստարկները և դիրքորոշումը.**

«Երևանի Մխիթար Հերացու անվան պետական բժշկական համալսարան» հիմնադրամը ՀՀ ֆինանսների նախարարությանն ուղղված 12.07.2019թ. թիվ Վ02.4/[14563]-19 գրությամբ հայտնել է, որ «Երևանի Մխիթար Հերացու անվան պետական բժշկական համալսարան» հիմնադրամը հայտարարել է «ԳՀԾՁԲ-2019/10-ԵՊԲՀ» ծածկագրով գնանշման հարցման ընթացակարգ, որի մասնակցելու նպատակով հայտ է ներկայացրել նաև «Ռեսալ Սոֆտ» ՍՊԸ-ն:

Գնահատող հանձնաժողովի 02.07.2019թ. թիվ 5 որոշմամբ արձանագրվել է, որ Հայաստանի Հանրապետության պետական եկամուտների կոմիտեի կողմից 26.06.2019թ. ստացված տեղեկատվության համաձայն, հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով «Ռեսալ Սոֆտ» ՍՊԸ-ի հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ժամկետանց պարտավորությունները գերազանցում են Օրենքով նախատեսված շեմը:

«Ռեսալ Սոֆտ» ՍՊԸ-ն շտկման նպատակով ներկայացրել է հիմնավորող փաստաթղթեր, այդ թվում՝ Հայաստանի Հանրապետության պետական եկամուտների կոմիտեի հարկ վճարողների սպասարկման վարչության թիվ 11 բաժնի կողմից 02.07.2019թ.-ին տրամադրված թիվ 1315 տեղեկանքը, որտեղ հստակ նշված է, որ «Ռեսալ Սոֆտ» սահմանափակ պատասխանատվությամբ ընկերության հայտը ներկայացնելու օրվա դրությամբ՝ 16.05.2019թ. հարկային մարմնի կողմից վերահսկվող եկամուտների գծով ունի ժամկետանց պարտավորություններ, որոնք գերազանցում են «Գնումների մասին» Հայաստանի Հանրապետության օրենքի 6-րդ հոդվածի 1-ին մասի 2)-րդ կետով սահմանված շեմը:

Հիմք ընդունելով Հայաստանի Հանրապետության պետական եկամուտների կոմիտեի կողմից տրամադրված տեղեկատվությունը, ընթացակարգի գնահատող հանձնաժողովը 08.07.2019թ. նիստի արձանագրության թիվ 6 որոշմամբ, «Ռեսալ Սոֆտ» ՍՊԸ-ի հայտը մերժել է:

Պատվիրատուն, պատշաճ ծանուցված լինելով ՍՑ-ՆԳ-2019/124 ընթացակարգի շրջանակներում 25.07.2019թ. ժամը 10:15-ին հրավիրված նիստի վերաբերյալ, չի ապահովել իր ներկայացուցչի մասնակցությունը:

#### **4. ՍՑ-ՆԳ-2019/124 ընթացակարգի քննության համար էական նշանակություն ունեցող փաստերը.**

ՍՑ-ՆԳ-2019/124 ընթացակարգի քննության համար էական նշանակություն ունեն հետևյալ փաստերը.

1. «Երևանի Մխիթար Հերացու անվան պետական բժշկական համալսարան» հիմնադրամի կողմից իր կարիքների համար հայտարարվել է «ԳՀԾՁԲ-2019/10-ԵՊԲՀ» ծածկագրով գնանշման հարցման ընթացակարգ, որին մասնակցելու նպատակով 16.05.2019թ. հայտ է ներկայացրել «Ռեսալ Սոֆտ» ՍՊԸ-ն:

2. Ընկերությունը հայտի թիվ 4 հավելվածով ներկայացրել է գնային առաջարկ, որի ընդհանուր գինը 2-րդ չափաբաժնի մասով կազմում է 52 000 000 ՀՀ դրամ:

3. Ընթացակարգի գնահատող հանձնաժողովի 21.06.2019թ. ժամը 10:00-ի նիստի թիվ 4 արձանագրությամբ կայացված որոշմամբ՝ «Ռեսալ Սոֆտ» ՍՊԸ-ն ճանաչվել է առաջին տեղ զբաղեցրած մասնակից Ընթացակարգի 2-րդ չափաբաժնի մասով:

4. ՀՀ պետական եկամուտների կոմիտեի կողմից ՀՀ կառավարության 04.05.2017թ. թիվ 526-Ն որոշմամբ հաստատված «Գնումների գործընթացի կազմակերպման» կարգի 44-րդ կետի հիման վրա 26.06.2019թ. տրամադրված եզրակացության համաձայն՝ **«Ռեսալ Սոֆտ» ՍՊԸ-ն հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունի 55 000 ՀՀ դրամի չափով ժամկետանց պարտավորություն:**

5. Ընթացակարգի գնահատող հանձնաժողովի 08.07.2019թ. ժամը 12:00-ի նիստի թիվ 6 արձանագրությամբ կայացված որոշմամբ «Ռեսալ Սոֆտ» ՍՊԸ-ի հայտը մերժվել է:

**5. ՀՀ գնումների հետ կապված բողոքներ քննող անձի հիմնավորումները և եզրահանգումը.**

ՀՀ գնումների հետ կապված բողոքներ քննող անձ՝ Գրիգոր Ներսիսյանս, ուսումնասիրելով ՀՀ ֆինանսների նախարարության 19.07.2019թ. թիվ 26/26-1/12057-2019 գրությունը, «Երևանի Մխիթար Հերացու անվան պետական բժշկական համալսարան» հիմնադրամի 12.07.2019թ. թիվ v02.4/[14563]-19 գրությունը՝ կից փաստաթղթերով, հայտնում եմ հետևյալը.

«Գնումների մասին» ՀՀ օրենքի 6-րդ հոդվածի 1-ին մասի 2-րդ կետի համաձայն՝ բացառությամբ սույն օրենքի 23-րդ հոդվածի 1-ին մասի 1-ին, 3-րդ, 4-րդ և 5-րդ կետերով նախատեսված ընթացակարգով գնում կատարելու դեպքերի, գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունեն իրենց ներկայացրած գնային առաջարկի մինչև մեկ տոկոսը, բայց ոչ ավելի, քան հիսուն հազար Հայաստանի Հանրապետության դրամը գերազանցող ժամկետանց պարտավորություններ:



Օրենքի 6-րդ հոդվածի 1-ին մասի 6-րդ կետի համաձայն՝ բացառությամբ նույն օրենքի 23-րդ հոդվածի 1-ին մասի 1-ին, 3-րդ, 4-րդ և 5-րդ կետերով նախատեսված ընթացակարգով գնում կատարելու դեպքերի, գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Օրենքի 6-րդ հոդվածի 2-րդ մասը սահմանում է, որ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը ընթացակարգ է նախաձեռնում գնումների հետ կապված բողոքներ քննող մարմնում՝ առանց վճարի: Տվյալ մասնակցի կարծիքը լսելուց հետո գնումների հետ կապված բողոքներ քննող անձը սույն օրենքի 50-րդ հոդվածի 6-րդ մասով սահմանված ժամկետում որոշում է կայացնում մասնակցին սույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

«ՀՀ պաշտպանության ժամանակ զինծառայողների կյանքին կամ առողջությանը պատճառված վնասների հատուցման մասին» ՀՀ օրենքի 10-րդ հոդվածի համաձայն՝ դրոշմանիշային վճարը զինծառայողների կյանքին և առողջությանը պատճառված վնասների հատուցումն ապահովելու նպատակով սույն օրենքով սահմանված կարգով և չափով ՀՀ պետական բյուջե վճարվող պարտադիր վճար է, որի վճարման պարտականությունը կատարվում է յուրաքանչյուր հաշվետու ժամանակաշրջանում սույն օրենքի 12-րդ հոդվածի 1-ին մասով սահմանված չափով դրոշմանիշ գնելու միջոցով:

«Հարկային ծառայության մասին» ՀՀ օրենքի 4-րդ հոդվածի համաձայն՝ հարկային մարմնի կողմից վերահսկվող եկամուտները՝ ՀՀ պետական և համայնքների բյուջեներ վճարվող հարկերի, տուրքերի և օրենքով սահմանված վճարների, դրանց նկատմամբ օրենքով սահմանված կարգով հաշվարկվող տույժերի և տուգանքների ամբողջությունն է, որոնց հաշվառումը, հաշվառման և (կամ) վճարման նկատմամբ հսկողությունը, մուտքերի ապահովման վերահսկողությունն օրենսդրությամբ վերապահված է հարկային մարմնին:

«ՀՀ բյուջետային համակարգի մասին» ՀՀ օրենքի 17-րդ հոդվածի 2-րդ մասի ժե) պարբերության համաձայն՝ հարկային եկամուտներն են՝ դրոշմանիշային վճարները:

ՀՀ կառավարության 04.05.2017թ. թիվ 526-Ն որոշմամբ հաստատված «Գնումների գործընթացի կազմակերպման» կարգի (հետայսու նաև՝ Կարգ) 32-րդ կետի 1-ին ենթակետի համաձայն՝ հրավերով նախատեսվում է նաև, որ մասնակիցը հայտով ներկայացնում է՝ իր կողմից հաստատված հայտարարություն՝ հրավերով սահմանված մասնակցության իրավունքի և որակավորման չափանիշներին իր համապատասխանության մասին:

Կարգի 32-րդ կետի 20-րդ ենթակետի համաձայն՝ եթե մասնակցի՝ հրավերով նախատեսված գնումներին մասնակցելու իրավունք ունենալու և (կամ) որակավորման չափանիշները բավարարելու մասին հայտով ներկայացված հայտարարությունները որակվում են որպես իրականությանը չհամապատասխանող կամ մասնակիցը կամ առաջին տեղ զբաղեցրած մասնակիցը հրավերով սահմանված կարգով և ժամկետներում չի ներկայացնում հրավերով նախատեսված փաստաթղթերը, ապա այդ հանգամանքը համարվում է որպես գնման գործընթացի շրջանակում ստանձնված պարտավորության խախտում:

Կարգի 43-րդ կետի 3-րդ ենթակետի համաձայն՝ հայտերի բացման նիստի ավարտին հաջորդող աշխատանքային օրը հանձնաժողովի քարտուղարը էլեկտրոնային փոստի միջոցով Հայաստանի Հանրապետության կառավարությանն առընթեր պետական եկամուտների կոմիտե (այսուհետ՝ կոմիտե) հարցում է ներկայացնում առաջին տեղն զբաղեցրած մասնակցի՝ հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ժամկետանց պարտավորությունների, ինչպես նաև հրավերով «ֆինանսական միջոցներ» որակավորման չափանիշի գնահատման

համար սահմանված պայմանների առկայության վերաբերյալ՝ ներկայացնելով մասնակցի անվանումը և հարկ վճարողի հաշվառման համարը:

Կարգի 44-րդ կետի համաձայն՝ Կոմիտեն սույն կարգի 43-րդ կետի 3-րդ ենթակետով նախատեսված հարցումն ստանալու օրվանից երեք աշխատանքային օրվա ընթացքում էլեկտրոնային փոստի միջոցով տրամադրում է հարցման մասին տեղեկատվություն: Սույն կետով սահմանված ժամկետում կոմիտեից տեղեկատվության չստացման դեպքում մասնակցի ներկայացրած հայտարարությունները համարվում են իրականությանը համապատասխանող: Եթե կոմիտեի կողմից սահմանված ժամկետից ուշ ներկայացված տեղեկատվությամբ արձանագրվում է, որ առաջին տեղն զբաղեցրած մասնակիցը հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունեցել է օրենքով նախատեսված շեմը գերազանցող ժամկետանց պարտավորություններ կամ չի բավարարում հրավերով «ֆինանսական միջոցներ» որակավորման չափանիշի պահանջները, և պայմանագիրը կնքված չէ, ապա տվյալ մասնակցի հայտը մերժվում է: Եթե սահմանված ժամկետում տրամադրված տեղեկատվության արդյունքում մասնակցի ներկայացրած հայտարարությունը որակվում է իրականությանը չհամապատասխանող, ապա հայտերի գնահատման նիստում հանձնաժողովի որոշմամբ տվյալ մասնակցի հայտը մերժվում է՝ անկախ մասնակցի կողմից կոմիտեի տրամադրած տեղեկատվությունից տարբերվող տեղեկատվություն ներկայացվելու հանգամանքից: Սույն կետով նախատեսված որակավորման չափանիշի գնահատման ժամանակ հաշվի է առնվում սույն կարգի 47-րդ կետով նախատեսված ընթացակարգը:

«Երևանի Մխիթար Հերացու անվան պետական բժշկական համալսարան» հիմնադրամի կողմից իր կարիքների համար հայտարարվել է «ԳՀԾՁԲ-2019/10-ԵՊԲՀ» ծածկագրով գնանշման հարցման ընթացակարգ, որին մասնակցելու նպատակով 16.05.2019թ. հայտ է ներկայացրել «Ռեսալ Սոֆտ» ՍՊԸ-ն:

Ընկերությունը հայտի թիվ 4 հավելվածով ներկայացրել է գնային առաջարկ, որի ընդհանուր գինը 2-րդ չափաբաժնի մասով կազմում է 52 000 000 ՀՀ դրամ:

Ընթացակարգի գնահատող հանձնաժողովի 21.06.2019թ. ժամը 10:00-ի նիստի թիվ 4 արձանագրությամբ կայացված որոշմամբ՝ «Ռեսալ Սոֆտ» ՍՊԸ-ն ճանաչվել է առաջին տեղ զբաղեցրած մասնակից Ընթացակարգի 2-րդ չափաբաժնի մասով:

ՀՀ պետական եկամուտների կոմիտեի կողմից ՀՀ կառավարության 04.05.2017թ. թիվ 526-Ն որոշմամբ հաստատված «Գնումների գործընթացի կազմակերպման» կարգի 44-րդ կետի հիման վրա 26.06.2019թ. տրամադրված եզրակացության համաձայն՝ **«Ռեսալ Սոֆտ» ՍՊԸ-ն հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունի 55 000 ՀՀ դրամի չափով ժամկետանց պարտավորություն:**

Ընթացակարգի գնահատող հանձնաժողովի 08.07.2019թ. ժամը 12:00-ի նիստի թիվ 6 արձանագրությամբ կայացված որոշմամբ «Ռեսալ Սոֆտ» ՍՊԸ-ի հայտը մերժվել է:

Այսպիսով՝ ՀՀ պետական եկամուտների կոմիտեի կողմից տրամադրված եզրակացության համաձայն՝ «Ռեսալ Սոֆտ» ՍՊԸ-ն հայտը ներկայացնելու օրվա դրությամբ ունեցել է հարկային մարմնի կողմից վերահսկվող եկամուտների գծով «Գնումների մասին» ՀՀ օրենքի 6-րդ հոդվածի 1-ին մասի 2-րդ մասով նախատեսված շեմը գերազանցող ժամկետանց պարտավորություն, մինչդեռ Ընկերությունը հայտի թիվ 2 հավելվածով հայտարարել և հավաստել է, որ բավարարում է «ԳՀԾՁԲ-2019/10-ԵՊԲՀ» ծածկագրով ընթացակարգի հրավերով սահմանված մասնակցության իրավունքի պահանջներին:

Ընկերությունը Գնումների հետ կապված բողոքներ քննող անձին ներկայացրել է ՀՀ պետական եկամուտների կոմիտեի 18.07.2019թ. թիվ 1379 գրությունը, համաձայն որի 16.05.2019թ. դրությամբ Ընկերության դրոշմանիշային վճարի գծով ժամկետանց պարտքը կազմել է 55 000 ՀՀ դրամ, որը վերաբերում է 2018թ. օգոստոսից դեկտեմբեր և 2019թ. հունվարից մարտ ամիսների հաշվարկներին:

Ընկերությունը ներկայացրել է նաև «Ինեկոբանկ» ՓԲԸ-ի համապատասխան վճարման հանձնարարականների պատճենները, որոնց համաձայն՝ Ընկերության կողմից 2018թ. օգոստոսից-դեկտեմբեր և 2019թ. հունվար ամիսները դրոշմանիշային վճարի գծով համապատասխան փոխանցումներն (ընդհանուր՝ 42 000 ՀՀ դրամ) իրականացվել են ոչ թե դրոշմանիշային վճարների համար նախատեսված «900005001186» հաշվեհամարին,

այլ Կենտրոնական գանձապետարանի հարկերի միասնական «900008000490» հաշվեհամարին:

Ուսումնասիրելով ներկայացված փաստաթղթերն արձանագրում եմ, որ Ընկերության կողմից հայտը ներկայացնելու օրվա դրությամբ արձանագրված 55 000 ՀՀ դրամից 42 000 ՀՀ դրամի չափով 2018թ. օգոստոսից-դեկտեմբեր և 2019թ. հունվար ամիսներին դրոշմանիշային վճարի գծով Ընկերության կողմից կատարվել են համապատասխան փոխանցումներ (վճարման հանձնարարականում որպես գործարքի նպատակ նշվել է դրոշմանիշային վճար), որը սակայն իրականացվել է ոչ թե դրոշմանիշային վճարների համար նախատեսված «900005001186» գանձապետական հաշվեհամարին, այլ հարկերի միասնական «900008000490» հաշվեհամարին, ինչի պատճառով պարտավորությունը փաստացի չի մարվել:

Այսպիսով, Օրենքի 6-րդ հոդվածի 1-ին մասի 6-րդ կետի «ա» ենթակետի համաձայն՝ մասնակիցը ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե խախտել է գնման գործընթացի շրջանակում ստանձնած պարտավորությունը, որը հանգեցրել է գնման գործընթացին տվյալ մասնակցի հետագա մասնակցության դադարեցմանը:

Նման պայմաններում, հաշվի առնելով Ընկերության վարքագիծը նաև այն հանգամանքը, որ Ընկերության կողմից իրականացված փոխանցումների մեջ թյուրիմացաբար նշվել է «900008000490» հարկերի միասնական հաշվեհամարը, հետևաբար գտնում եմ, որ «Ռեսալ Սոֆտ» ՍՊԸ-ն «ԳՀԾԶԲ-2019/10-ԵՊԲՀ» ծածկագրով ընթացակարգի շրջանակներում թույլ չի տվել ստանձնած պարտավորության խախտում, հետևաբար Ընկերությանը գնումների գործընթացին մասնակցելու իրավունք չունեցող մասնակիցների ցուցակում ներառելու հիմքեր առկա չեն:

Ինչ վերաբերվում է 13 000 ՀՀ դրամ դրոշմանիշային վճարի մասով առկա պարտավորությանը, ապա սույն մասով արձանագրում եմ, որ այն չի գերազանցում Օրենքով նախատեսված շեմը, այն է՝ Ընկերության կողմից ներկայացված գնային առաջարկի մեկ տոկոսը:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասի 2-րդ կետով՝

## Ո Ր Ո Շ Ե Ց Ի

Հայաստանի Հանրապետության ֆինանսների նախարարության 19.07.2019թ. թիվ 26/26-1/12057-2019 գրությամբ «Ռեսալ Սոֆտ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը մերժել:

ՀՀ գնումների հետ կապված բողոքներ քննող անձի որոշումն իրավապարտադիր է և ուժի մեջ է մտնում տեղեկագրում հրապարակվելու հաջորդ օրը:

ՀՀ գնումների հետ կապված բողոքներ քննող անձի որոշումը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

Գնումների հետ կապված  
բողոքներ քննող անձ՝



ԳՐԻԳՈՐ ՆԵՐՍԻՍՅԱՆ